

## **Radunonza communal, venderdis ils 16-6-2023, 20.15, la fermata**

### **Messadi davart il credit per bunificar la prestaziun preliminara privata per il vau d'aua a Clasgieri**

Preziadas votantas e prezias votants

#### **1. Situaziun da partenza Pascal Darms**

Pascal Darms ha survegniu igl onn 2022 la lubientscha da baghegiar per il project da dislocar e realisar sia stalla nova. Sche e cura ch'ei duei vegnir baghegiu sper la stalla ina casa da habitar, ei aunc aviert.

Sco cundiziun per quella lubientscha da baghegiar ei vegniu fixau dallas autoritads che la basa per il provediment d'aua futur stoppi vegnir scaffida el rom d'in project separau.

#### **2. Situaziun da partenza IG Badugns**

Ulteriurs possessurs da mises el contuorn Badugns ein sinquei semess ensemen ed han fundau sut la direcziun da Gion Cathomen la IG Badugns.

Las partidas interessadas ein secunvegnidas davart in perimeter per il project e sin basa d'in schazetg dils cuosts dil biro d'inschigniers CWZ AG (Falera) han ellas confirmau lur participaziun.

La lubientscha necessaria per construcziuns ordeifer la zona da baghegiar per realisar las lavurs da construcziun bassa giavischadas ei avon maun dapi igl uost 2022.

#### **3. Prestaziuns preliminaras provediment d'aua Clasgieri**

El decuors dalla dislocaziun dalla stalla e dalla casa da habitar igl onn 2011 ha Rumetg Cathomen realisau e pagau sez las mesiras edificialas e tecnicas necessarias per il vau d'aua Clasgieri. Cun la cunvegna dils 8 da november 2011 ein il vau d'aua e tut las installaziuns idas senza cumpensaziun els mauns dalla vischnaunca.

Per ch'ils mises da Badugns e la stalla nova da Pascal Darms sco era eventuals baghetgs novs ni ulteriurs interessents sappien egl avegnir vegnir provedi cun aua, drova ei cunvegnas novas e claras.

#### **4. Sligiazion futura**

Per rugalar la situaziun per il futur ei la vischnaunca da Falera prompta da bunificar las prestaziuns preliminaras finanzialas da Rumetg Cathomen.

La finanziaziun denter las partidas cumpigliadas succeda cun diesch parts tuttina grondas. Da quei surpren la vischnaunca da Falera senza duas parts.

La vischnaunca da Falera ha ligiau siu engaschament vida cundiziuns ch'ei ferton vegnidas ademplitas da tut las partidas cumpigliadas el project. Sin il termin dalla radunonza communal dils 16 da zercladur 2023 ein avon maun en favur dalla vischnaunca da Falera tut las garantias da surprender las otg parts restontas dils cuosts dall'infrastructura per il vau d'aua Clasgieri

#### **5. Proposta**

La suprastonza communal propona a Vus d'approbar il credit brut da CHF **193'082.90** sin basa dallas explicaziuns survart, per che la prestaziun preliminar da Rumetg Cathomen sappi vegnir cumpensada e las midadas necessarias sappien vegnir fatgas.

Falera, ils 2-6-2023


#### **El num dalla suprastonza communal**

**Wendelin Casutt**  
president communal

**Adrian Vincenz**  
canzlist

#### **Annexas:**

- plan actualisau cun il perimeter dil project
- gliesta dils cuosts / clav da repartiziun dils cuosts per il vau d'aua Clasgieri



**Gliesta dils cuosts vau d'aua Clasgieri – cuosts Rumetg Cathomen**

Cuosts totals inclus TPV	188'851.90
Subvenziuns GVG GR	<u>-21'335.00</u>
	167'516.90
Cuosts actuals per renovar il vau existent	<u>25'566.00</u>
<b>Cuosts totals</b>	<b>193'082.90</b>
cun 10 partidas, part da cuosts da mintgamai	19'308.30